



東江詩鈔卷第四

太倉唐孫華實君橐

—— 受業陸

師巢雲編



奉使出都

弓刀小隊簇雕輪  
細雨霏霏泥路塵  
到處競看承傳客  
當年舊是棄繻人  
會稽竹箭爭磨礪  
京國槐花憶苦辛  
最是君恩容覲省  
倚閭應慰白頭親

禹城道中雨

危塗咫尺怕傾輶  
黯黯重雲不散愁  
夾轂已憐泥沒膝  
前驅遙見笠蒙頭  
溪澗每怯臨流馬  
樹暗時聞喚雨鳩  
安穩一帆輸畫鷁  
計程何日到揚州



過郊城有序

予於甲子春以明經充賦至京師道過郊城聞縣令方君之賢至丙子歲予官吏部奉使浙中復過郊城則方君尚爲邑令迎予於郊外及就邸來謁詢之其爲郊令已十四年矣爲之慨然而作

傾蓋祠邊躑躅行絃歌久已挹芳聲折腰有吏淹元亮乘傳無才愧長卿山縣閉城閒夜柝清時罷役動春耕遲君二紀方登第

方君名殿元甲辰進士予以戊辰登第

翻訝車前手版

迎

次蒙泉東蒙道中韻

岸草青青尚似袍可堪雨沐又風饕繞隄柿葉初張傘

半嶺松聲欲起濤索飯客憐村市遠採茶人踏石梁高往來頻照觀河面旅髡蕭疎感二毛

高郵阻風

停驂自淮陰征車繫金柅人勞思暫逸舟居愛便美簫鼓沸中流平波正渺瀰倘邀風力便揚州片帆耳誰知抵秦郵驚飈土囊起噫氣號調刁激雨射牕几長年齊著力退尺進僅咫須臾勢轉狂萬艣一時止鳥影斷長空儵魚匿淵底屋瓦爭怒飛草木盡傾靡幸無波濤險平沙得暫穰勝友共嘯歌寒簾看煙水但懷簡書畏終須戒行李何當乘長風破浪日千里

過淮陰學舍省徐霆發病



千里辭家襜被輕誰知漳浦臥劉楨講堂寂寞生苔蘚  
射圃荒涼長蔓菁屋角一牀支敗壁河流三版浸危城  
故鄉二頃谿田在悔不當年早退耕

過淮陰見數百人舁土置城下問之云河堤欲潰  
將以土塞城門怒焉心悸作詩告哀為淮民危之  
也

淮陰城下聲洶洶蟻聚千夫擔土籠往來恰似營巢燕  
累重寧殊蝨蠹蟲共說河隄行潰決數闔便欲丸泥封  
吾聞此語重歎息人謀如許何匆匆昔日河邊集萬艦  
攤錢白晝安流中自從淮黃勢合并奔騰激怒爭為雄  
精衛銜石心已盡孟津捧土誰能壅柳條不長隋堤禿

竹篠頻翦淇園空金錢糜耗不知數咄嗟仰屋煩司農  
尋丈旁穿螻蟻穴咫尺下瞰蛟龍宮高田極望浩煙水  
十年不種黍與種居人棲息雜鳧鴨浮楂寄頓編茅蓬  
黃母為龜恐不免羽淵化能將毋同城內城外皆赤子  
何忍村落填長碁傳聞官長能備豫衣袵夙戒修艤艫  
當今誰似王尊勇屹然身捍金隄衝安得黃淮仍醜析  
驅歸海若長朝宗芻粟年年便飛輓直沽轉盼雲帆通  
篷牕拊枕方寤歎發船打鼓聲逢逢

寓樓即事次蒙泉韻

高樓突兀喜同登時有輕風散鬱蒸壘嶂俯窺千頃碧  
繁星倒映萬家燈解鞍乍息征途倦洗眼初看煙水澄



直待鎖闈公事了六橋屐齒興須乘

試院煎茶次東坡韻

當年憶作青袍生燥吻出火枯腸鳴今來槐院飽豐膳  
素蘘細泛槍旗輕自慚面目本無二迴首敢忘辛苦意  
湘潭碧芽許同煎武彞紫筍潑清泉不辭得隴復望蜀  
更乞黃山千片玉同考陳君滄洲餉湘潭茶杜君秉用  
餉武彞茶又從磐菴索得北源松蘿  
席舍風簾正苦飢誰分一琰慰愁眉西湖萬頃不療渴  
竹符調水難相隨論文當如品泉味無忘矮屋脣焦眼  
倦筆乾時

試院即事兼示同事諸君子

泔泔磔雨入蕭辰硯几相依恰二旬兄弟同年分四坐

功名異日待三人

用浙闈故事

風搏鵬鷲非無力浪起魚龍

會有神自媿麻衣難再著濡毫欲下重逡巡

勝友同堂快盃簪千篇重作洛生吟但愁襲錦收燕石

為愛清絃惜爨琴桂苑徵書群彥會槐花席帽昔年心

白袍門外方延佇好藝蘭膏續寸陰

東坡杭州催試官  
考校詩云願君聞

此添蠟燭門外  
白袍如立鵠

榜發浙中才士之未薦者多過予邸舍以所業請

益摳衣肅拜無幾微不平之色且有具贄幣願執

義門牆者予深愧之為賦詩解嘲且以慰諸君子

焉

鏤院陰森秋雨天目營萬卷亂雲煙按揚本是司衡意



科第終憑造化權過眼暫迷日五色藏身只隱霧三年  
蘭筋一蹴應非晚努力前途看著鞭

收采難窮董澤蒲可能一網盡珊瑚自拋文字荒蕪久  
况迫程期心眼麓祇覺藍田都是玉敢言赤水竟無珠  
多蒙方叔能相恕只媿秤量異蜀蘇

浙闈撤棘後聞以銓曹公事連染左官

西風蕭瑟動秋林忽有郵書報解簪鐫降本非 明主  
意護持猶費故人心敢因誤中讐飄瓦豈意流言致鑠  
金恰喜蘋洲鄉路近綸竿早擬釣江濤

乘軺建節為掄才奇士終須出草萊一榻清風心似水  
三更官燭淚成堆餓鷓枉把鷓雛嚇春燕從教鷹隼猜

較比翟公添氣色青袍日日到門來

壽朱立雲七十

織屨先生雅好文清如霜鶴迴離羣傳家賸有青氈物  
落筆爭分白練裙賓榻共傾東閣酒扁舟同泛洞庭雲  
尚書祠墓今秋草當代何人肯客君

立雲為玉峰尚書公所延與予同客

洞庭

蕭然物外得吾真詩有清才畫有神身隱何慙蓬髮子  
房空早別掃眉人不談戒律依僧住偶溷屠沽與市鄰  
千載桃椎更誰匹高風又見葛天民

和葉星期明府題錢瞿亭園用杜工部遊何將軍

山林十韻十首存八



甲第連園榭閑扉倚小橋平坡通細石喬木倚重霄地  
濶波無際山深隱可招誰言城市近塵外足逍遙

跌坐桃笙淨高眠蕙帳清褰簾迎乳燕停曲聽流鶯果

薦梁侯柿珍調穎叔羹輕軒娛眺望時奉板輿行

賦梁侯鳥  
柀之柿

堂構人皆有漂搖各不支瓦松生壞壁枯葑塞華池管

領兒孫事興衰草木知多君勤葺理花藥正紛披

愛月常刪竹憐苔不掃花高吟驚夜鶴落筆笑秋蛇燭

跋還教續杯乾未用賒承平風景在獨指舍人家

樹是先公種山從張老開

雲間張南垣所營

堤淡容偃桂閣敞

恰當梅地得寰中勝峰疑海外來休嫌孤石瘦依舊長

### 蒼苔

曲欄收野色暗澗響流泉日暖花生霧春淡柳放綿頻

添臨水閣不費買山錢好景憑誰畫依稀是輞川

勝地山堂最風吹暗綠香面軒峰嶺秀背檻栝松涼蟾

影升欄上羲輪得樹藏石林清話久相對鬢毛蒼

待制有避暑  
錄話謂星期

人生兼四美不樂復如何仕路憂端集家居勝賞多華

燈月姊避豔曲雪兒歌半作吾廬看蘇端得數過

敬題先師朱昭芑先生遺像二十六韻

先生名明鑄  
為復社名宿

夫子誰儔匹吾猶及典刑道風傳泗水學海極滄溟博

物稱文府熏人是德馨時逢遷亳社不擬裸周廷偕隱



田居室淡棲野史亭鑽研讐往紀寂寞抱遺經萬卷判  
頭白千秋待汗青

先生有史書十三種未刻

共瞻通德里獨指帝車

星朝議思周黨鄉人敬管寧但看鴻避弋誰想鳳儀庭

問字賓常滿修書筆不停爭光懸日月破曉發雷霆趣

召通宵闕趨迎集衆靈

先生未病時夢上帝使人趣召及病革夢百神來迎

異香

鄰共訝仙樂耳親聆歲有龍蛇厄關無虎豹扃飄搖來

絳節荏苒降雲輶夙昔承嘉訓提攜自弱齡淒涼憐短

褐刷養望修翎都講堂前立微言帳後聽曾誇雲際鶴

愧老案頭螢

予自成童先生極加獎賞許為國器

鴛乘煩輕策洪鐘扣寸

莛衣冠非世代圖畫仰儀形空紀文中語誰攜有道銘

銜鱸楊氏宅下馬董公塋絕學慚窺管遺書守挈鉞何

由報知己感極涕交零

上巳日同西士浩如及頤兒遊淮雲寺

眼明初出郭幽勝得淮雲浩劫留餘刹殘碑認斷文寒

梅經雨壓細麥愛晴熏何處湔裙好相攜到水濱

舊愛山門好平臨百頃田人耕紅杏雨鳥掠綠楊煙尋

斧長松倒孤亭野蔓懸祗餘雙櫟樹終老不材年

閏三月十八日同忍菴宮贊錢瞿亭舍人王憲尹

太守曹九成明府邀韓州牧集忍菴堂中觀伎

落花風雨方瀟瀟綠陰夏淺客可招吳歛雅曲嫌耳熟

別打羯鼓停笙簫金陵少年賭絕藝拍張跳擲誇雄豪

鷹隼視氣鬱怒衲襠縛袴爭騰驍雪練光明及丈二



雙手搏弄如承蜩迴旋撇捩鬪輕疾金蛇霍霍俄纏腰  
兩夫植立肩白棒翻身倒挂同飛猱都盧尋撞渾容易  
險竿直上何飄颻有時拳足似宿鷺倏忽脫架橫秋鷗  
將擒復縱快鳥過蹲踖踞地成虎跳壯觀蔚跂公孫劍  
盛氣衝突周郎刀礪鶻初淬芙蓉鏢當軒拔鞘風颺颺  
別布瓊瑜開院本縱金伐鼓聲噴嘈西涼假面逞變態  
遼東妖婦妝嬌嬈鬼笑靈談各暘暎沐猴冠狗憑輕趨  
吾曾觀樂到燕薊北客所尚多喧呶此輩健兒好身手  
侯門幕府爭相邀勅勒歌終旋舞罷纏頭一曲堆紅綃  
吾儕寄興聊復爾如厭梁肉持車螯耳目逢新亦可喜  
佳處往往時一遭世上賞音盡如此飲罷月影樓頭高

題宋大中丞漫堂先生西陂魚麥圖

昔讀春陵行憂思何悄悄遂欲帶笭箬刺船就浩淼我  
公經世才安民取不擾詩成侔化工萬象茁春曉兩地  
施霖雨千篇發幽渺遭逢非聲叟亦苦簪組繞披圖見  
江湖一櫂入窈窕隴首鋪黃雲煙際飛白鳥波平翠荇  
齊風起綠楊裊默坐若有思流目恣憑眺所願夢維魚  
豐年叶佳兆更願崆峒熟 王師罷旗旄功成歸綠野  
樂事尋臺沼予生燕雀微棲息甘蓬篠思從午橋遊待  
公濟時了

愷功侍讀用予贈夏重原韻有詩寄懷次韻答之  
憶別淶水園行李遂夙戒驅車齊魯郊平田半萋稗盲



雨兼狂風衣袂日露灑河淮賸一隄溝渠決九派殘黎  
巢屋巔面目多腫噲見莊子征途變涼燠素秋忽已屆

聞君擢承明茲事聊一快西清致身難迨指爭門隘昔

人指蓬池比擬神仙界獨慚蹇拙人吏議無端挂去去

勿復言咄咄休書怪握粟何從占擲米恥逞獐頭顱足

可知簪紱終須解三釜養未充一劔緱餘蒯由來耿介

性不下車塵拜吹毛競索瘢怒視各張眦蛛網織已成

蠅污壁憂敗惟君篤風義欲貫王調械奮身扶顛危出

手排厲蠱見莊子知我坐連染歎息腕頻搯左官受薄謫

如疾得小瘥仕宦本畏途膽悸復齒齧歸來出籠笈病

馬便爬疥蟻陣聽輸贏燕壘任成壞流言等飛蚊著體

僅一嘷感君急難心已矣勿長喟授徒有遺經訓子著

家誠惟荷君相知受恩如負債功名竟何如歲月寢

以邁長歌聊當呻小賦不堪賣君今列清華周廬免植

鍛出西賦詞苑但先鳴雞羽何煩芥

營葬事畢復之墓所築室種樹紀事四首

高敞行營地東偏卜築成過橋才數武為室且三楹宰

木防樵采平疇便鎰耕居然塵市隔落日爨煙生

丙舍村農守茆檐不厭低寺鐘樵徑北流水小橋西籬

淺牽藤蔓門間面菜畦先賢有廬墓便欲把鋤犁

翠栝移來小扁舟泊近谿葉霑行路雨根帶故山泥月

下看烏遶陰成待鶴樓滋培十年力終見拂雲齊



香好終憐柏花開欲餌松土新防觸鹿歲久望成龍密  
影全遮日穠陰不避冬向來茅葦地一望早丰茸

過靜逸菴訪宗岐兼懷錢太僕再亭

礪壑居然遠市闌金魚牢落掩松關漲流初漫橋邊水  
亂葉全遮屋外山蕙帳空聞孤鶴怨草堂曾見幾人還  
京塵好處知何在輸與滄江野叟閒

抱病漳濱歲月淡詩成集欲號呻吟

宗岐方病

涸魚願豈煩

滄海飢鶴心難戀舊林塵世何妨餐白石長生須學鑄  
黃金可憐飲興年來減明月同誰對淺斟

夏日齋中讀書

閑居寡人事奈此夏日長吾師延叔堅味爽坐容堂紛

綸布經籍汎濫陳篇章抗懷千載上高詠思陶唐念彼  
隴畝人揮鋤汗流漿我無四體勤北牖吹微涼不殖恐  
將落徒爲食黍蝗

火雲方灼爍逢迎少軒車幸此豐暇豫縱意觀羣書紫  
茄兼白苧飽食不求餘昔聞此堂中日日鳴笙竽鼙聲  
沸鄰屋蒲飲間歌呼茲堂亦遭逢忽與文史俱飛蚊聚  
一晌彼樂非我娛人生各有志何用分賢愚

戴角無上齒傅翼恒兩足物生有定分彼羸此或縮我  
無經世材天衢敢追逐生幸識文字稟受未爲薄日攜  
一卷書瀟灑送炎燠忘憂代萱蘇破睡調茗粥蓬蒿未  
用芟留此一庭綠常笑襜褕人塵中空錄錄



衰年疲應接常思傷村墟隙壤栽梧竹清池覆芙蓉同  
志結良友帶經竝耰鋤此意終未遂仍卜市廛居叢攢  
植梅杏枝葉亦扶踈朱門足亭榭寂寞養禽魚主人出  
仕宦煙月鎖空虛真宅定何在且復憩我廬

日車不肯下亭亭駐畏景萬卷恣穿穴汲澗愧短綆人  
生求竒書標日記乙丙貪多忽尋常經史翻未省我書  
固不多食息足遊騁陶冶發性靈金玉出頑礦薄暝抵  
小秋東廊挂月影

喜姜西溟及第

姜侯及第初傳信朝野歡呼更相慶 天子由來以字  
稱上言及西溟必呼其字 兒童自昔知名姓殿鼓雷鳴唱第時卿

雲旭日交輝映遇合人生固有時文章自信寧關命羨  
君意氣窮益堅愛君才筆老益橫文瀾浩汗本韓歐詩  
格冲融逼王孟紛綸腹笥是經神欵忽頭濡驚草聖十  
年史館効編摩千里遨遊疲歷聘曾看長揖對將軍時  
有雄談侵執政迂踈每怨散人狂峭直應知君子性長  
安客舍喜連坊往往樽前發高詠糲飯常同啜菜羹清  
言不厭揮犀柄輕薄爲文多少年一老風流我所敬但  
是成名莫恨遲歲晚蒼松節彌勁時來瞬息籟風雲歷  
官尚可中書令

治圃三首

爲農力不任爲圃可小試牆邊剝瓦礫得此一弓地旁



有鄰家池清泉出澎漚甘息漢陰機抱甕亦容易折柳  
作藩籬狂夫倘知避禪林度踈鐘樹色交遠翠落日時  
攜筇披襟受涼吹欲采汜勝書多方謀種植樊侯樹梓  
漆歷久方成器取給貴目前長算非吾事宿昔不窺園  
久負董生志何如把廁澁灌畦安晚計

婆娑兩梅樹託根在水涯主人既不視一任茨棘遮東  
縛少生意卑枝自槎牙譬如絕代姝憔悴委泥沙爾生  
既非所藤蔓紛交加感此長歎息親手為爬掌辟除去  
荒穢壅土培汙窪積困久未蘇當春會萌芽雖憐翠袖  
薄亭亭亦清佳池光蕩孤影踈枝映橫斜敢希調鼎實

庶見銜霜花

何遜梅花詩  
銜霜當路發

肉食非不佳造物不我許菜把願常供園官不我與不  
如自斲鬪終歲充蔬茹縱橫剪荒榛羅立宥老楮未應  
嗔野莧且望圻萬苴春韭及晚菘鱗次各有序既欣新  
雨滋復蒙曉露滑脉脉土膏流幡幡風葉舉想當採掇  
時碧色照筐筥我豈種菜人敢倣英雄語但飽腐儒餐  
何用速肥羜為我謝屠門從今不恩汝

送門人時期五貢入太學

憶昔逢君猶少俊綠髮鬢鬢方覆顛翻水文成得我驚  
期君變化風雷迅豈知蟠伏久泥沙二紀流光都一瞬  
徵書忽下選英髦鷺羽西雍飛始振姓氏喧傳衆口誇  
君才自是千人儁得寸功名未足竒騰籟青雲此發軔



練川文筆舊稱雄太僕薪傳應未燼君先柱史播清芬  
突兀班心直聲振羅雀閒門近百年摧頽行馬人誰認  
邑中惡子任猖狂往往纓綏被蹂躪幸君閉影守窮廬  
堅白超然免緇磷才名雖宿齒方強渥丹顏色猶青鬃  
溟海當橫萬里鯤燕臺正購千金駿曳裾太學盛文儒  
只恐如君才亦僅故鄉孫趙兩同年爲我相逢各問訊  
孫郎聞已厭承明趙叟何時提縣印握手長安喜不孤  
追隨應比驂從靳玉河楊柳薊門花歡遊莫作思歸引  
贈行未辦繞朝鞭聊作巴歛當餽贖望君騫翥已多年  
成名早寄南鴻信

蔬食

生平藜藿腸雅不饕肉食春雷動植物紫笋冒土坼入  
饌肥且鮮從人笑食箚持梁刺齒肥時來亦易得苟無  
利物功何異甘帶螂傳聞齊魯間埽地千里赤析骸炊  
枯齒掘根采葑蔥江鄉薄有秋亦苦生理窄吾徒乃安  
坐糜穀類螟螣但使腹可果敢辭顏有墨負耒吾何能  
一飽猶愧色

同里朱立雲工書善畫頗能爲小詩家貧每居蕭  
寺衰年病肺藥餌無資余爲致薄少之助兼作詩  
書之扇頭以詒之庶幾同志中有見余詩者繼聲  
屬和或哀其憔悴稍爲援手云

吾愛織屨生神情自蕭逸詩有長慶風畫做倪迂筆瘦



田沒藜蒿老屋摧蓬筭獨宿贊公房不入猗頓室喜從  
吾儕遊爲計誠已失兩窮共綢繆相憐不相益青熒分  
禪燈終夜苦啾唧已空法喜妻偶示維摩疾不逢勾漏  
砂誰給華陽蜜梁武重陶弘景勅所在月  
給茯苓白蜜以供服餌藥籠多參苓  
徒手那可乞吾欲扶其衰援溺羞短絀人生異苑枯緩  
急有倉卒華筵破一金樗蒲散百鎰豈知屯躓人炎歎  
蒸病骨友朋通有無閭里貴任卹但邀毛粟施行謀擣  
松朮且復留此翁陶陶共永日

輓徐霆發學博

一第非難事文章苦命憎逢時何潦倒得酒尚飛騰薄  
宦家千里官倉米五升生平知己淚沾灑爲徐陵

萬事誠難了君真未了身頻年百口累失計一官貧聞  
笛山陽路招魂楚水濱應知歿猶視祇爲白頭親  
祐善徒虛語蒼穹不可呼復苓虛藥籠首蓓冷官廚產  
盡生前券人求歿後逋清卿門第在振起望諸孤

輓張覲文

兄弟推時譽馳驅並俊英早驚摧仲子今又哭慈明薄  
命悲無祿人情忌有名平生驩狎久何計效驢鳴  
飛蓋西園夜名流燕賞頻紫藤張繡幄綠草藉芳茵名  
字人間有生涯末路貧傷心煙月徑無復昔時春  
丹旆歸何處尚書舊賜阡昔年文讌地今日總帷懸老  
桂秋煙外殘碑落照邊西華葛陂冷辛苦更誰憐



冬月畏寒苦無爨室於堂之東偏舊有迴廊遂葺  
以爲屋每於午餘日照西牕暄煖可愛偶憶宋人  
小說云貧兒無衣見日出則云黃綿襖子出矣予  
居貧裘褐不辦適符斯語因顏之曰黃綿室即事  
言懷得詩十首

往還客斷雀羅門紙瓦虛明愛晚暎高臥恰同嵇甯煖

庚信小園賦嵇康  
鍛甯既煖而堪眠

淡居常比晏裘温爐香茗椀宜人靜

蠶紙蠅書便眼昏留待夜來憑几坐疎櫺先受月華痕

空齋莞結自悠然消受竒温歲暮天布席劣能容坐榻

編蓬約略似牽船僦居何用成三五

史記龜策傳爲屋  
不成三五而居之

言物不慵起無勞候八磚但得藜羹麤自給也應生活  
取全也

勝焦先

魏書胡叟云我此  
生活似勝焦先

市躑且喜耳無聞小葺虛廊丈室分甲煎香濃煙起霧

硯池冰解墨蒸雲殘書熟讀生新味好客時來賞晚曛

聞道翠華臨雪磧欲將暄景獻

明君

吟屐寒苦飽經嘗老去偏知愛景光龍尾趨朝衝曉雪

馬蹄緣坂踏晨霜蠶於絲盡須成繭蜂到花稀欲就房

宦學生平終底用煖簷贏得一繩牀

坐睡醺然白醉中羸軀常藉煖光烘不栽密樹嫌遮日

牢合重扉爲障風解贈綈袍無故友平分裋褐有天公

凌兢寒士知何限欲餉斜陽半壁紅

結客尋思洛下歡千篇聲價竝琅玕生耽書卷原關性



事到文章不論官爭遣群賢同巷陌祇緣良友憶長安  
篋中尚有聯吟句展向西牕仔細看

朔風昨夜響刁調虛白閒齋轉寂寥莊老慵繙愁舌強  
篇章時詠漸頭搖陰生窗隙知雲過溜滴簷牙聽雪消  
且學幽人忙塞向莫思泥壁和香椒

素冠如雪鬢成絲改歲長銜風木悲親不逮存安用祿  
身將終隱莫工詩怯寒早似迎霜柳就煖還如向日葵

底事溺人猶強笑搔摩恰比負牆時

見柳州與李翰林書

葭牆蒿室只如村寥落何人肯見存烏上屋山窺夕照  
蜂投牕紙戀餘溫木棉花軟添殘絮菜把霜肥足晚飧  
勞苦越中重趼客時來妝點翟公門

浙中諸門下士時來慰問

轉曠年華逝水催窮陰又見一陽回只今蓬室橫經坐  
憶昔金門拜表迴繡線長難添髮短吹葭冷不動心灰  
春風豈解趨炎熱會放暄和陋巷來

### 戊寅除夕

垂老光陰等逝波一年草草又輕過淡宵燈下燃其煖  
豐歲街頭爆竹多短綆有心揆卷帙長繩無策繫羲娥  
徵逋人去差堪慰寂寂閒門任雀羅

冬溫幾日氣如春暮齒驚逢改歲頻莫曆序新繙好日  
桃符色退似陳人井枯計較先儲水爐冷支分更益薪  
堪笑贏餘底處覓也隨鄉俗賽錢神

### 巳卯元旦



晨興先勅具椒漿自整衣冠拜影堂謝客門庭非舊雨  
感時節物又新霜忽驚燧火從頭換敢恨屠蘇最後嘗  
一著退耕差較穩占年預擬問農祥

瞳矓旭日散晨暉梅蕊長晴竟不肥斑白容顏慚舊物

王僧虔誠子書云吾在世雖乏德素故自一舊物青紅兒女鬪鮮衣咿啞繡襖

雛孫長寂歷衡門賀客稀却歎孤根同草木守殘窮臆  
盼春歸

又疊前韻

鬻頭猶剩隔年漿寥落江天一草堂眸子暗添書上霧  
鬢絲難掩鏡中霜翻波世態藏頭過嚼蠟榮途染指嘗  
富貴迎來應已晚不從宵夢問何祥

紅牋萬戶燦朝暉樂歲階除鳥雀肥兩載清門辭版謁  
予以服不受賀三年逐客解朝衣街衢人醉壺殮賤公府官閒  
符檄稀轉盼春風飛紫燕不嫌茅棟自知歸

聞惠研谿明府訃

鼎不可烹雞馬不可守閭用才失其宜賢哲常崎嶇嗟  
君抱碩學國器矜璫璣逶迤由左計自厭承明廬一官  
落劇縣風濤驚鷓鴣出師當孔道翩翩過征旗薪芻兼  
莖豆日日徵軍儲詹帑旣殫竭辛苦勤補苴上官歎材  
能應變固有餘如何集妖鵬大命遽忽諸憶從平津閣  
與君竝舍居高談發聾聵箋釋辨蟲魚及予官長安值  
君投牒初同好得數子出入聯裙裾筆墨各飛動粲粲



瓊與琚自君縮墨綬戚戚無歡娛長鬚頻過我月接數  
紙書上言供億苦空手自拮据下言日祈死念母復躊  
躇予時相慰藉努力待遷除豈知丹旆返長途送柳車  
悲君有老母三釜望已虛耿耿歿猶視銜痛當何如古  
來才與命往往相齟齬齟齬平聲從孫恹韻彼蒼有好惡疑與時  
俗俱世方讐雋異天亦代翦鋤斯人不再得流涕重欷  
歔

日晚放舟

行役嗟頻數經過百里中潮添瓜蔓水帆挂藕花風露  
草黏螢火秋籬語暗蟲來舟防擊觸相喚各西東

題眼醫何藏之小照

人身要用明與聰與其爲瞽毋寧聾擿埴索途竟何適  
階前咫尺迷西東仲堪偏盲猶小患輕雲蔽月常朦朧  
人生誰似張司業城南遊跡重扶筇白楊門巷出奇士  
天遣夫子開群蒙囊底神鍼誰所付妙用正在阿堵中  
燕南趙北遊屐遍群兒車畔迎吾翁金篦刮目去障翳  
歔忽剪水明雙瞳空青一點竟何物如此迴斡非人工  
捺荒搦髓可遍試兼將藥餌扶衰癯束芻針鬼止夜泣  
神術直與幽冥通拍肩群瞽世何限補救造化天無功  
知君骨相本奇古行年七十顏猶童吾從圖畫識君面  
頎長黝黑昌而丰長生或是羨門侶游戲下界來空桐  
吾年垂老目已眇恍惚頗訝玄花重勾君指點授要術



直視不眩朝光瞳雙眸閃閃爛巖電細書小字箋魚蟲

杜門

夏日清課次  
王隨菴韻

長裾席帽滿人寰似我無能合閉關蓬矢前期羞白首  
芒屨晚興負青山庭無鵲噪扉常掩地任蛙鳴草不刪  
獨苦坂田焦灼甚身閒那得抵心閒

科頭

露紆頽然一室寬影纓人共笑衰殘巾從漉酒頻嫌浣  
髣已成霜久耐寒幸免簿書狂束帶休逢姍罵溺儒冠  
蓬頭且學丘明士敢向時人白眼看

搖扇

炎歊熏灼苦連旬賴有蒲葵巧製新當急可無舉手力

逢秋常感過時人好同松塵資清話每與琴書拂郭塵  
兩載已辭江夏枕攜持只伴病餘身

翦蔬

抱甕終朝學夏畦筠籠滿摘落提攜灌園仲子猶存母  
食菜周顛尚有妻草惡虛名刪燕麥籬防闌入徒雞棲  
為農無力聊為圃未辨腰鎌問灑溪

夏旱二首

輟耕隴上歎三農牲玉何由籲六宗杲日終朝張火傘  
閒雲隨意作竒峰私家飯甕休先計天府神倉自要供  
懶惰兩工鞭不起憑誰一喚葛陂龍

雷車寂寞失豐隆散盡陰霾日日風乾笑祇看玉女電



斜陽并隱美人虹

美人虹見詩經注疏

桔槔爭水村村急  
簫鼓祈

神處處同歎息  
蒼生貧到骨非關私計  
祝年豐

元宵前一日同年郁愚齋招同王麓臺沈台臣王

潞亭夏疇觀燈

瑟居成嬾癖獨喜到君家  
衢市當門直林泉帶郭斜  
雪

輕旋作雨籬短不藏花  
敢厭春泥滑城南路未賒

愛客容蓬鬢留歡憩草堂  
曲欄人不到勝地日初長  
晝

手看王宰

是日看麓臺畫

清談得沈郎

台臣在坐

忘歸判

平聲

卜夜隨

意偃匡牀

丘壑從心得園廬  
覓徑紆連岡環淺渚遠樹接平蕪  
牕

豁容山入梅寒倩竹扶  
柳州思靜退有地且名愚

鄭驛陳賓榻虞棕備食單  
淹留容竟日絡繹命傳餐  
中

置翻三歎經營爲一歡  
坐饗豐膳美物力念艱難

元夕後三日大雪因憶辛未冬北上界首阻雪慨

然成詠

人言雨雪豐年瑞居人稱好旅人嫌憶昔征軺北上時

朔風刮面霜刀銛乍見彤雲方靉黳俄驚密霰飛廉纖

偃臥郵亭僵不起十指皴凍如排籤惟聽疲驢齧棧草

時看飢雀投茅檐敗席作扉半破裂往往吹屑粘鬚鬣

飢腸雷鳴不可忍硬餅強嚼如魚噉起看戶外堆三尺

千里已縞青山尖此時歎息厭滕六願加鞭逐無留淹

今年久旱得春雪階前亂撒空中鹽我方宴居坐無事



匡牀布褥垂青簾茗椀爐香正馥郁丈室趺坐心安恬  
乃知雨雪殊不惡人生觸境分酸甜安知不有行路客  
銀沙亂灑掀車幘我今幸免差自慰誓願老死棲窮櫬  
作詩自懺苦雪句三白試驗農人占

喜四弟筠令將歸故里

失計辭鄉井孤身託外家相違才數舍邈若在天涯貧  
賤無親戚艱難歷歲華先人綿悒際念此每長嗟  
累重憂端集家貧生事微祇緣吾拙宦遂致汝長飢傲  
氣窮猶在親情久漸非故園花信近須及早春歸  
吾衰猶彊力汝病日侵尋少壯羞秦贅窮愁感越吟近  
看顏面好稍慰弟兄心不見翻飛鳥終須集故林

虎丘遲錢澹園大行不至

名山多巉巖攀陟疲要膺宜人獨虎丘緩步入佳處亭  
臺綴朱碧靚妝如好女天風挾我行飄飄雙袂舉陰池  
閔魚腸古木走蒼鼠不辭竟日淹獨往無勝侶所期人  
不來登舟復延佇搖搖柔櫓聲煙中聽人語

虎丘即日

山容愛清曠無取多著屋茲山殊不然連娟好妝束參  
差旗亭開窈窕僧廊曲凌緬無遠步流覽入近目譬如  
園墅遊宛轉經行熟不知始何年生祠塞山麓昔有某  
中丞乘勢作威福按牢百城空破產萬戶哭錦綺疊連  
船金銀載折軸至今作瘡痍流亡猶未復有祠名樂康



屹立山之足民愚豈可欺徒使山靈辱峴首曾悲羊望  
江常祀麴遺愛苟在民何事煩版築爾非韓擒虎談者  
頸猶縮我欲付焚如山水返空綠

二月二十二日毘陵舟中大雪因憶往年予館凱  
功侍讀齋遇雪常用東坡韻作詩往復甚多今孤  
舟獨坐迴想一堂倡酬之樂爲之慨然因爲此詩  
寄凱功復用東坡病中大雪韻

昔年朱邸雪好句屢誦和別離今幾時獨唱愁無那桃  
柳方向榮密霏忽飄墮孤篷衝逆浪一葉任軒簸旣非  
鄂君舟豈有一笑嗟紛紛投碎米天上誰旋磨窮客免  
關譏知我船無貨叶光久侵權青皞氣摧挫春淡未拆  
綿猶戀殘瓊坐雖無暖帳飲猶勝閉門臥遭逢有定分  
何路無坎坷君看東郭生履穿足泥浣餘齡瓦猶全一  
官甑已破自審本疎慵不中京房課故人篤恩義曾救  
子桑餓執手定何時無恙還相賀

英孫

古人抱孫不抱子愛子愛孫情不判昨歲生孫今已期  
頭玉嶢嶢足傳玩孟陬初誕小於菟孫生於寅犀角崢嶸色  
精悍雙眉乍刷翠羽鮮兩目方開巖電爛周晬還張湯  
餅筵羊酒賓朋動里閭公然繡葆出堂前坐客齊聲加  
激贊兒生頗覺質非凡廣顙長頭早魁岸口不能言心  
自靈索物咿啞手指案憶昔初生汝父時寶愛真如璧



與瓚三齡共詫虎頭奇千里常期駒血汗歎如春柳逐  
年長碌碌行能無足算小時聰了大不然乃知此語非  
欺謾渠倘生兒似客兒我反駢顏愧生瑒謝玄生子瑒不慧及瑒生  
靈運幼便穎悟玄異之常曰龍文五色異虬蛇鳳毛九  
采非鵝鶴風骨何須壯始成一種天然自璀璨假令慧  
性應青睛會見英聲起弱冠長文未必慚太丘少蓋當  
疑代茂灌薄德何能鍾子孫流年且祝無災難我家素  
業只詩書屬汝他年繩舊貫獨嗟牢落少詒謀兩鬢鬢  
髣髮垂蒜待汝成人定幾時老人嬉戲姑添伴人情兒  
癖不厭諛豈盡中郎賞元歎誠知獎譽本非真拊掌聊  
為一笑粲

賃小舟渡江

舴艋牽來一葉輕片帆無恙趁初晴波光散作鞞紋細  
風緒收歸鏡面平烏榜人間頻俯仰江船人使槳一俯一仰青峰  
湍轉忽縱橫昔年迴首乘車夢打鼓鳴笳破浪行

京口泊舟

六朝京闕此襟喉鐵甕城高控石頭荆益帆從天際下  
金焦峽東大江流蘄王鉦鼓寒潮逝劉寄旌旗廢壘秋  
千古英雄形勝地也容閒客漫淹留

瓜洲屯船塢泊舟

乍脫長波占一灣無憂得似白鷗閒江邊風蹴來船浪  
天外雲遮隔岸山草市千帆停估舶茅廬三尺臥魚蠻



錢郎未渡應相羨恰似雞鳴早過關

遲澹園不至

東江詩鈔卷第四

東江詩鈔卷第五

太倉唐孫華實君橐

受業陸師巢雲編

維揚舟中作

孤舟風雨泊經旬柳陌桃隄未放春  
草岸連宵隨鷺宿水牕竟日似鳶蹲  
襯牀紈暖留淡坐壓頂篷低礙欠伸  
贏得淮魚賤如土堆盤膾縷煮銀鱗

東南佳麗數維揚紅粉飄流逐舶商  
空谷未聞傾國貌褰帷都作倚門妝  
半牀絃管秋娘老十里珠簾小杜狂  
詞賦風流今未絕愛才誰復似奇章

淮黃併合作厯喧堤勢空思折柳樊地  
異潮州誰徙鱷



波如江夏恐成龜人隨鳧鴨蘆中宿浪擁蛟龍窟外翻  
獨使 至尊憂墊溺諸公何策救黎元

勝事人傳跨鶴遊客囊羞澀滯揚州市魁多曳青綳綬  
優笑居然紫綺裘塵閑五方通果布女紅十歲學篋篋

生來不作樊川夢直是當年許散愁許散愁北齊人自少不登變童之牀  
不入季女之室

故鄉松檟隔新阡節物清明又一年宿草陳根招復地  
斜風細雨鬼神天黃壚處處提簞食綠柳村村挂紙錢

獨有旅人歸未得半盂麥飯冷炊煙是日清明  
御筆賜故相宋文恪公篤念前勞匾額恭紀二律

許身直擬學臯夔沙路登庸髡已絲劬瘁頻煩宗社計

哀榮獨結死生知隴殘宿草親交淚石到生金 聖主

思貞觀去聲漫言魚水契猜嫌曾仆魏公碑

文昌上相冠三台櫪馬宵驚世共哀秘器舊頒膺寵渥

奎章追錫仰昭回生前事業調金鼎歿後形容鑄鐵  
明皇思張九齡鑄胎鐵胎肖像祀之 家訓教忠須報 國韋平賴有後

人才

南巡扈蹕詩為宋葑洲太史賦

當代才華推小宋年少清池看浴鳳相門兩世受 君

恩馳驅誓許為時用西征昔歲動 鑾輿躍馬籟糧請

隨從紅粟千車助飽騰紫臺萬里親輸送功成斂手就

清班 楓宸每獎勲勞重今春扈 蹕復南巡畫舫青



簾謝塵鞿聊將山水濯征衣更別沙場捫蘚洞何況吳  
閭是故鄉閭門畫錦驚騶哄 聖主憂勤為視河農扈  
乘時觀播種須如賈讓策穿渠更學平當明禹貢莫奏  
揚雄羽獵篇應陳鮑照河清頌

輓朱立雲

傭書曾住翠微亭憶共扁舟泛洞庭石瀨同看千頃碧  
礪牕閒寫數峰青詩訓彊韻敲銅鉢酒遇歡場倒玉鉶  
歎息風流雲散後孤筇白髮感飄零

僧廬佛火度晨昏家在谿南挂月村眼已生花攜短硯  
肺因多病減芳樽年豐尚自愁征稅身老猶思顧子孫  
憶共遠公相對後更無履跡到衡門臘月下旬君過余齋雙鳳印公適至

留與同飯自  
此永訣矣

哭曹九咸明府

曾報初春病俄聞朝露捐三年嶺海吏廿載孝廉船名  
晚官偏短兒遲累尚懸新詩多好句知否後人傳曾以詩集

屬予  
作序

經世非無具循良亦有名浪傳蠻土沃誰信粵裝輕世  
久嗤廉吏天猶忌老成桐鄉遺惠在尚說長官清  
投牒期猶遠息息便跨鞍暮年成一第貧計急微官客  
路逢迎少家庭去住難公車淹泊地生死滯長安  
同里論游好惟君有古風折腰憐傲吏掩耳作家翁婚  
嫁何由畢功名竟未終善人摧折早灑淚問蒼穹



閒居寫懷十首

久客困塵鞅稅駕得吾廬劣能容几席安用屋渠渠山  
居自知獵澤居自知漁我本經生家麓知課詩書古人  
務殖學誦讀兼耕鋤我無四體勤不學復何如文章供  
苑囿經史當菑畬賴此送日月餘事真土苴

恢台值朱夏圭景日方長常愁執熱至暫欣梅雨涼膏  
液乍霑灑草木生新香清風動林樾柯葉紛低昂葵蔬  
冒土出採擷頻盈筐遙想隴畝人秧馬方奔忙我今免  
作勞偃仰讀書牀飽食有餘愧稽首祈年康

性不喜人事戢翼思卑棲叩門苦剝啄欲封一丸泥愛  
此連朝雨爲我却輪蹄沉臥失曉旦喑喑聞鳴雞盥漱  
坐書堂黑雲壓檐低琤瑤聽奔溜巷陌成溪谿老農知  
袖手坐看秧針齊一飽庶可望豈敢厭羹藜

少年志卓犖挾策期功名晚晚登仕路連蹇竟無成儒  
緩多下考獯狡推時英俯仰天壤間無地著書生賣漿  
及洗削奮起影華纓而我廁其間馬食夾兩黥歸來埽  
一室差覺心眼明擾擾長安客何時到公卿

夜寢簟八尺朝餐飯一盂人生易爲適何必求贏餘彼  
哉饕餮子按剔窮錙銖傾身自障麓至死諡錢愚銅山  
拉然崩不知爲誰娛我生本寒苦形容山澤臞經營昧  
什一路鬼從擲揄篔簹取自給此外復奚須

屈伸固有命秋毫非人功三世不徙官執戟老揚雄荀



爽起布衣百日至三公  
援臂終數竒李蔡本下中  
龐眉既潛顏皓首仍悲馮  
世有巧而躓亦或拙而通  
憂喜塞翁馬得失楚人弓  
時命苟不諧不如安固窮  
用世寡時用翰墨期策勲  
縱觀古人作浩然絕涯垠  
大巧謝雕琢神運非斧斤  
舉世工織妍刺繡矜織紋  
王風淪蔓草自鄮復何云  
近知學古方服氣咀芳芬  
藹藹玉生煙霏霏山出雲  
安得陶謝手晨夕共論文  
騫利久成俗民生競錐刀  
貨殖慨史遷錢神感魯褒  
頗聞士大夫心計窮秋毫  
何以仁義為多財自稱豪  
習成固難挽流波日滔滔  
餓理倘入口經營亦徒勞  
溥天同偏仄窮豈獨我遭  
不見摯太常糧絕死山臯

風雨撼故廬徙居城東陬  
後堂頗爽塏亦足避喧啾  
堂西餘隙地雜種杏與榴  
交柯攢暗綠飛鳥得所投  
涼飈動夏木颯颯如高秋  
尚苦近塵市應接人事稠  
終思返農圃卜築遠村幽  
諒無郗嘉賓為我謀菟裘  
貴室多富姻貧家足窮親  
瘠壤無豐植菀枯一氣均  
嗟予門祚薄兄弟多苦辛  
叔也尤坎軻敝褐行負薪  
望我仕宦成扶掖出遭屯  
斯願竟不遂顧我常沾巾  
時給升斗水未足活枯鱗  
有粟姑分餉庶及秋穀新

次韻錢瞿亭舍人水亭落成

剪剪輕風動薜蘿  
俄成水閣跨巖阿  
不遮簾幙看山好  
免繚牆垣受月多  
晝靜閒聽黃鳥哢  
雨來新長白鷗波



葦間疑有延緣棹髣髴如聞漁父歌

六月十五日自書齋入內足誤踐衣而蹶傷脣流血創甚戲作

吾衰遽如許平地遭傾跌徑荒蔓草纏雨過苔蘚滑貧家乏使令書卷自攜挈譬如蝨蝨蟲戴重乃一蹶自憐狼跋胡翻羨印負螿遠愧邢子才不履內舍闌平生走四方自詡慶忌捷登山健如猱誰謂躓於坵便恐肌骨傷豈惟屐齒折沾裳見猩紅孽鏡憂兔缺待補方干脣幸全張儀舌所愁牙齒寒漸恐妨舖啜正嫌編貝疎可使藩籬撤幸無樓上人指笑老人蹙兩輔遂臃腫頗似受批擊不見樂子春傷足憂懨懨自昧下堂戒悔恨那

可說持此面向人赧汗增內熱

過吳符鄴齋觀荷兼憶魯岡先生

朱夏閒乘一日涼芙蓉出水試新妝風吹碧浪搖青蓋露溼紅衣綻綠房唼唼魚苗穿細荇翩翩燕子掠垂楊清池華薄依然在猶是濂溪舊草堂

軒名君子取周子愛蓮說

捕鼠

我觀萬物中無如鼠最惡有皮不成革無牙自能嚼

陸氏

埤雅鼠有犧牛曾被傷騏驎安能攫奈何足此物晝伏

齒無牙夜乃作齧我架上書穿我牀前幙引儔自叫呼得意頻跳躍卑或棲承塵高或穴重閣窶藪銜已滿孳生種尤博一孕輒八九牝腹各如橐未學幽人熏有類永州虐



積忿畜文狸將以觀擊搏朝餐具腥羶夜臥席莞蒨長  
養垂一年雄姿果騰踔雙爪成鈎距兩眸光閃爍獠輕  
上高危隱伏慣按索時看堂下磔快甚城頭膊威行頗  
知懼夜寢安寂寞狸走忽無蹤一去如黃鶴惡物復縱  
橫垣墉恣穿鑿諒知莫予毒憑陵故自若更乞東家狸  
白鹽裹青箬俗以鹽換狸爪牙尚未成軀小僅如雀始至鼠  
猶疑欲出復前却偵知不足畏跳踉乃轉劇狸怒時張  
目自顧審力弱白晝屋壁間有聲屢膈膊招呼室中人  
四面遮羅絡揆穴攻中堅二鼠俱就縛牝牡已雙擒庶  
免胎孕數晒彼五技窮供我一笑樂我狸行長成猛氣  
生齟齬爾輩勿橫行會須同穴砣儀禮注玉棘砣鼠

秋日雜詩

一夕涼風動秋林已颯然雲疎常帶雨木落不棲煙野  
菊牆邊委寒瓜屋角懸蕭森誠可愛亦復惜流年  
聞說淮南地驚濤正怒奔濕煙寒土銜濁浪拍籬門雞  
犬尋高樹魚龍占廢村吾鄉猶薄稔一飽媿饕餮  
宿雨何時霽寒風昨夜高人情向裋褐世事急錢刀入  
水蝗無種是歲蝗不為害登盤蟹有膏一樽聊自慰窮豈獨吾  
遭

暄霧晴難久涼曦景易斜驚鳥衝落葉寒蝶抱殘花文  
好誰千載詩成自一家子公音問絕無信到京華  
同周礫圃訪溪公於禪燈菴次礫圃韻



適喜周顥至期將慧遠尋荒榛侵路狹落葉擁橋淡樵  
徑疎人跡松門送梵音精廬茗椀共客語雜蟲吟

剥啄何人到毛萇一揖迎端峯詩能論正變語不近譏

評日轉桐陰薄風微竹院清蕭閒塵世外擾擾笑浮生

輓曾耳黃孝廉

鬼伯偏摧旅客身連翩池翊動歸輪已聞曹植歸丘日

曹子建詩生存華屋處零落歸山丘又值曾家執燭辰學舍追隨憐歲久

異鄉依倚轉情親天留後死渾無謂屢望燕臺哭故人

十年襍被滯長安射策金門興未闌兩月前書至猶言來歲春聞尚圖一

決日暮壯心千牘在河清皓首一官難山妻形影悲遺

挂嫁夫人先亡愛子馳驅尚跨鞍憶就藜牀常共宿青綾夜

雨話更殘君性愛閒靜每主人謙會輒過子邸舍共宿

賀王冰菴太守納姬

許迎桃葉久逡巡誰道褰幃事果真銀燭宵長光似晝

綺牕冬暖氣如春每從夢裏尋金枕忽向天邊墮玉人

半臂添來攤卷夜香奩應擘綵箋新

十五盈盈下鈿車夢蘭消息未嫌賒兒佳會著潛夫論

子貴還興絡秀家仙樹晚花終得果玉田春暖自生芽

明年湯餅應呼我帶醉題麈一笑譁

述悲

峻嶒犀角不凡姿奮起孤生上玉墀豈有官高貽玷缺

定緣門雜起瑕疵臨危悔別華亭鶴披繡空憐太廟犧



負郭無田居未卜清貧那得九重知

少壯追隨共里閔風流自昔富才情不登科第猶名士

久歷朝班到夏卿夏大也見左傳白璧蒼蠅遭點汙珍珠蕙苒

未分明丈夫死所要當擇一死鴻毛忍自輕

聖世遭逢位棘槐禍生名滅亦堪哀故鄉尚少誅茅宅

官舍翻成避債臺臣罪何顏對刀筆君恩無地答涓

埃廢屨有婦先長夜雙化啼鶻帶血回

有侍兒見予朝夕讀書笑語同伴云主人公尚欲

應舉耶予聞其言賦此解嘲

勤苦三冬趁歲餘綠衣菊晚竊軒渠人間富貴知無分  
身後文章計尚疎萬卷未揆頭早白一名雖就腹仍虛

休言誦讀書生事若箇書生解愛書

贈趙松一趙曾著讀史  
質疑一書

尼父著春秋大義揭星漢功罪無匿情是非有定案作

史與論史宜以經爲斷後儒恣穿鑿如絲各棼亂收誇

爾朱功壽訾武侯短蜀魏爭正閨島索互詆譎馮道善

變通武媚宜郊裸邪說旣紛紜大道日離畔矯矯趙夫

子朱墨久研鑽家貧出負米賓席弄柔翰六經貯巾箱

三史供點竄上下數千年一一如珠貫筆挾董狐直書

過袁豹半辯如懸河注目如巖電爛論準過秦覈語陋

美新謾示我兩卷書明牕得吟玩潛德幽必彰姦諛死

無逭南山豈可移先零何足按霍若雲霧披渙若春水



泮明史今未成授簡多疑憚白頭雖有期青竹何由汗  
如君著作才固宜參史館說經常鏗鏗陳史亦侃侃形  
諸直如筆千秋事可判庶稟魯史程得隨游夏贊惜哉  
擅三長無從效一算抱書菰蘆中慨然發永歎

落梅次倪草亭韻

灼爍妝成小洞春何當風捲玉蚪鱗早從冰雪衝寒臘  
便逐珠璣委路塵別浦流波如送客隔牆半面尚窺臣  
清遊曾蠟西山屐已誤花期後幾旬予於二月中遊西  
山而梅花已落

萬點飄零劇可憐翻嫌開早占春前枝空月觀虛樽酒

何遜梅花詩  
枝橫却月觀粉散妝臺負管絃陳後主梅花落  
詩拂妝疑粉散仙去羅

浮知是夢香消蒼蔔好叅禪息息又作經年別腸斷江

南細雨天

春日感懷次張蒿園韻

薰爐自剪粵香烘勝賞難期四美同浥草祇愁漂麥雨  
鳴條無奈落花風人間勞攘蜂窠裏天氣陰晴鳥語中  
却喜街頭蔬筍賤一餐未覺曉廚空

哭姜編修西溟

三紀論交誼最親同吟秋菊託南鄰予官長安西溟寓  
予舍南贈予詩云

賴是南鄰叟  
同吟秋菊黃孫弘稍恨登朝晚永叔方期變俗新清白

未渝平昔志冬烘終是暮年人文章聲價千秋在應有

桓譚賞絕倫

自是恩讐集舉場恩恩涉筆亦倉皇比鄰竊鐵真無罪



同舍持金別有郎命值斗箕騰頰舌星明貫索暗文昌  
早知寵辱須臾事應悔聲名達 帝閭

壽周礫圃七十

君家門閥推雙鳳科第聯翩盛群從朱轂文茵競十輪  
飛甍華屋連千棟轉瞬年來賦式微樂卻孫支半飢凍  
豈有風流繼典刑但矜刀筆工磨礪獨數髯生最軼群  
清芬奕葉傳書種遑謀夏葛與冬裘只解朝吟兼夜諷  
筆耕止仰賣文錢都講常分博士俸山間躡屐却籃輿  
花下銜盃傾酒瓮經營不事意寬閒機智全忘腹空洞  
偶逢時事一掀髯往往談言亦微中椎髻堪憐失孟光  
蓬頭豈必慚孺仲有兒盡力潔晨羞藜羹便抵牲牢供

詩書轉自窮愁親日月偏宜瀟灑送

杜詩瀟灑送日月

清貧不

受世相憐散誕渾疑天所縱高詠常聞金石聲清齋未  
覺簞瓢空肯隨貴介逐光塵祇有窮交相引重祖德猶  
存食舊風孫雛且自含飴弄每挾新詩束筍多袖中藪  
藪春蠶動不嫌陋室許頻過糲飯村醪亦時共七十年  
華彈指間盛衰俯仰槐根夢朋酒羊腔早見麾一詩爲  
壽吾從衆恨無好句繼吳均

謂振西

鄙語聊資滿堂闕

小病東松一

眼暗玄花髣有絲斟量應是病來時衡門謝客閒差得  
欵案觀書臥亦宜漫試麴窮真下策平調飲膳是中醫  
填膺鬱屈非能語不遇長桑那得知



十日黃梅雨滯淫爐香縈卷靜悒悒懶訓遠札遲雙鯉  
聊學輕身試五禽躍馬暗消年少力雕蟲潛耗壯夫心  
歸田賦就差堪慰免使羈棲感越吟

狎客

何來此狎客拍肩自紛紛眼不覩文字手不把鉏耜  
踰沐猴戲獍雜子女群叫譟沸螻蛄毀譽隨牙齧變態  
早暮異眉睫暄涼分朱門附翕熱如蠅集羶葷膏拭脣  
與舌罄折骨與筋或於蒲博場點籌効微勤或爲花鳥  
使設餌釣紅裙或能傳是非貝錦工織紋或時傅粉墨  
蒼鶻隨叅軍或時事僮隸低顏結歡欣喧呼日嘈嘈諧  
笑方云云玉笋露殘瀝洪爐借餘燠趨足跳山鬼駢頭

走飢磨戢戢附群蟻殷殷聚飛螽吾門自清肅勿使雜  
猶薰二三老儒生偕我共論文糲飯亦可飽濁酒亦可  
醺正變考雅頌淵源沂皇墳高談豁滯累抗志凌青雲  
清吟勝絲竹陶然竟朝曛颯聲正謹咋我耳如不聞爾  
曹謀作適自詣左阿君

夏月盛暑貧甚戲作

瓢飲蕭然笑屢空火雲夾日正瞳瞳一庭似覆炎官傘  
萬物愁銷大冶銅葛越身輕便暇日蒲葵手捉喚涼風  
菁羹糲飯吾能給若比焦先未是窮

梧風入座散炎暉熱客長辭闔兩扉飯顆形容原自瘦  
膏粱性質但能肥不斟綠蟻從杯化

銀盃羽化見唐書柳公權傳盡



換青蚨任穀飛荷芰已裁山野服判他倒篋典朝衣

宋大中丞漫堂先生馳賜新刻施注蘇詩賦詩以

謝

東坡先生列仙傳御風騎氣來瀛洲偶掉狂車弄雷電  
謫墮暫作人間游直氣干霄日月迴詞源倒峽江河流  
變化縱橫無不可觀其妙處師莊周自從太白騎鯨去  
逸氣再駕凌空輶王呂爭持成鑿枘章蔡茂惡紛戈矛  
片言吹索成詩帳一官坎壈投蠻貊依然筆墨自娛戲  
放曠不賦窮山囚天半迥然鸞鶴嘯俯聽萬鳥空喧啾  
南宋諸家競祖禰餘波猶使金元偷我慕蘇公欲鑄像  
焚香肅拜常低頭晝思夜夢見髣髴庶幾殘錦蒙分投

頗嫌舊注多謬誤刻畫面目成瘡疣顛倒歲月迷首尾  
割隸事類分鴻溝施家善本今散佚購訪何惜千金酬  
仇池仙人久羽化今之作者推商丘陶鎔百代入大冶  
抉摘萬象供冥搜前身疑是峨眉老官途閱歷仍黃州  
兩江持節作霖雨才如玉局遭逢優事簡長看鈴閣靜  
政成不廢滄浪遊吳興祕籍竟入手殘編齧翰自勘讐  
孝廉博雅真才子家學濟美承班劉毘陵邵子自超逸  
便腹不負蒼髯修一堂商略考同異千腋蒼薈粹成全裘  
重為眉山洗面目閃閃巖電開昏眸腐儒罷讀枕書臥  
扣門忽報來書郵捧函跪發喜過望直令寶玦慙鍾侯  
繭紙光明白玉版良工畢巧窮雕鏤耳聞此書久願見



茲焉實獲心所求展卷精新防手觸珍重愛惜同天球  
更從公乞綿津集雙懸冊府垂千秋

次韻訓宮恕堂

昔與君締交纖草附高樾情親來往稠不待修版謁時  
脫杜甫冠幸結王生韞一笑披君帷名香自馥醇長安  
聲利途齊井互相捽出莊子惟我同志友如印每負蟹君  
家門閥高哲兄擁旄鉞君才實挺生藥榜宜雙揭那無  
一第緣補此平生缺造物忌才名數竒示折罰酣歌燕  
市中醉草常濡髮分題鬪強韻險怪各搜擷聯驂聽鶯  
啼把酒看花發賴此忘故鄉談笑送日月賢豪豈常聚  
樂事有淪歇姜肱及惠施先後宿草沒存者各分飛死

者長薶骨我亦歸其鄉囚山墮崢岹落落餘數子趨朝  
繫纓笏近買二頃田荷鋤自墾堡苦無畏壘穰誰譽王  
駘兀素志安賤貧心計鄙鑽核樂生久去燕莊烏聊吟  
越飽聽殷雷蝨長辭照壁蝎一足踰踔孤何異守閹刑  
聞君阮秋闈霜蹄復累蹶萬卷恣沉研奧義劖株檝有  
子登賢書神駒見超忽一官累長君吏議挂倉猝貲郎  
不可爲早計失曲突聞君轍未停風埃尚蓬勃淮黃日  
橫流蕭條林竹竭袞袞多鉅公茆舍棲危塌君居蓮府  
中詞賦當勲伐河復會有時歸山種杞蕨起居幸慎旃  
經籍足貽厥嗟予自孤僨書空時咄咄譬彼失群鴻敢  
羨摩霄鷲君才固雄騫吾困慚槁杌郭璞客傲焦先  
混沌而槁杌旗



鼓詎相當庶備鈴下卒

八月十三日學山園玩月用韓八月十五夜贈張

功曹韻

西園公子舊清河紅欄翠閣臨澄波良朋勝賞乘月夜

風吹鄰院聞笙歌時鄰廟方演劇堦前唧唧蛩聲苦落葉渾疑

打牕雨雄談四坐詞峰高有耳誰聽寒蟲號黑雲俄作

壞山裂明月脫漏如奔逃盃槃草草飮梨栗屏却羊羶

與犬臊出禮記內則昔共學山昆弟四咿唔響徹聞林臯只

今驥足誰千里白日黃壚隔生死觀文星若早逝我從郎署左

官還十年浪走車班班叔子棲遲一經老形友季子卑宦

投南蠻允文試看月亦異圓缺升沉何獨悲人間惟有峰

巒尚如舊已覺衰病難躋攀夜溪鄰院亦停歌紉罰未

已仍嚴科清歡已極感舊多眼前兄弟俱非他毛詩兄弟匪他

月照華顛奈老何

再哭姜西溟有序

庚辰八月二十六夜忽夢西溟來謁余迎謂云聞

子凶問久矣子故無恙耶西溟笑曰余實未死也

余大喜坐語叙契闊良久而覺漏下四鼓矣為之

潛然而悲紀之以詩

憶昔官京師與君居連坊時方九月初同吟秋菊黃何

曾三日疎行止動相將君來披我帷箕踞輒登牀索筆

寫新詩字句必共商暮年獲一第賀弔翻同堂生平厲



志節所守廉以方百口足保明祗坐少隄防待物竟不  
疑坦率無他腸居然受欺賣禍由同舍郎厲階彼何人  
漏辟僅投荒殺人非曾參公論今已彰聞君蓋棺日橐  
無百金裝誰能直君冤上事排天閻夜夢忽見君復當  
秋夕涼音容故如昨髣髴頎而長君言實未死不死豈  
文章疇昔所著書笥櫝猶緘藏謗燄今已熄刮磨自生  
光世豈無桓譚扇此萬古芳夢覺益悽咽漬枕淚淋浪  
起視天未曙星漢正茫茫

責貓

空堂夜燈殘縱橫苦鼠竊架上餘陳編恣意供啖齧巧  
變百端聲健可十丈越一孕動八九滋蔓那可絕作計

購一狸喂養未曾缺貧家食無魚寸鮪窮搜括初來小  
如拳形與鼠相埒群鼠夜跳梁端然臥瓊瑁長大謂不  
然爪距足批拉惠養及二載肥澤若可悅鼠猶畏虛聲  
未敢便竊發豈知龐然形嗜魚僅如獺鼠窺覺無能夜  
動恣出沒叫譟若相賀銜尾共攜挈狸亦稍稍怒奮起  
思一決蹒跚未能上此物先兔脫習慣了不驚高眠聽  
喧聒但知舐魚碓不復窺鼠穴形雖小於菟伎倆但跛  
鼈蜡祭有迎貓田鼠祈噬齧爾稟金行氣柔悞獨不殺  
享此無功餐縱彼有齒黠驅之任所往裏鹽購雄桀會  
如永州戒一夕看殲滅

靈雨連晝夜不止聞田家敗穀爲之愴然



陰雨連旬昏曉迷濕雲似墨壓檐低薪芻貴比豪家蠟  
菜把權充太學壘草徑全沉喧吠蛤蓬牕如晦誤鳴雞  
從今月令渾難信秋潦收時水拍隄

吳符鄴生子請予命小名名之曰復志喜二首

試啼便識物非常犀角豐盈目有光敢比史遷傳子幼  
漫思羊傅繼中郎加憐只合名題犬失喜何妨字誤麀  
莫恨談家生較晚幸看珠顆浴蘭湯

男兒羅薦蘭湯浴罷時

西華葛帔路旁身祖德風流尚未淪仰屋只今愁十口

乘軒自昔活千人

符鄴祖魯岡先生奉使恤刑粵東活二千餘人

天留碩果終

須復家有傳書故不貧老眼洗磨猶可待門閭重見咽

朱輪

劉韋齋學博於講舍前補植雙檜乞余作詩紀之

老檜何時植亭亭講舍前根留殘劫後種自右文年直

節冰霜苦蒼皮缺石堅地偏忘歲月榦老拂雲煙柏葉

含蔥翠松身臥蜿蜒

爾雅檜柏葉松身

自矜鱗鬣古不受蔦蘿

纏半仆猶撐拒餘生尚曲拳固應愁鳥剝

庾信枯樹賦鳥剝蟲穿

何意竟龍顛

杜詩虎倒龍顛委棘榛

事等琴桐爨形慚社櫟全補

牢誠已晚培土計須先弱植才盈把扶攜但及肩未謀

千尺用且使兩株連各抱凌雲質雙擎偃蓋圓得邀春

雨力留待歲寒天卉物關消長榮枯有代遷幸辭莛豎

跡長蔭廣文擅用自淇泉得

衛風檜楫材從荆土傳

禹貢柁榦枯柏



詩經孔疏  
枯即檜也

由茲謹封殖無忘

去聲

角弓篇

左傳敢不封殖此  
樹以無忘角弓

常熟陸次公曾為撫州別駕重葺臨川玉茗堂設  
湯義仍先生木主演牡丹亭傳奇祀之詩紀其事  
屬和二首

臨川逸藻許誰群筆挾仙靈氣吐芬才子文章機上錦  
美人形影夢中雲金荃集在傳新句玉茗堂空冷舊芸  
騁騁吟魂來月夜落霞餘唱或時聞

使君才筆繼清河佐郡無心嘯詠多詞客風流悲逝水

箏人舞曲按迴波張融宅畔劉璉

音津

訪劉璉至吳曰聞  
張融與陸慧曉

並宅其間有水必有  
異味遂往酌而飲之

宋玉庭前庾信過往哲有靈應一

笑檀痕重掐斷腸歌

臨川句云自掐  
檀痕教小伶

### 和玉巢松送春詩用陸放翁懷成都韻

暮春景物尤酣縱雲昏霧煖天如夢黃帽爭維柳下船  
青驄競卸花邊鞚巢松先生老益雄春醉無妨聖人中  
才藻群驚掣海鯨蕭閒不羨爭池鳳梧竹交檐樹色淡  
薔薇壓架花枝重歷亂殘紅墜雨飛丰茸暗綠薰風動  
春去情同別故人一杯聊當臨岐送九十俄隨流水過  
十千須及芳時用小戶從嘲井上瓶窮居徒抱谿頭甕  
但祝春光去早迴明年還約朋簪共

### 和友人惜別

不離香閣遶牕紗鬢髮如雲臉暈霞每點宵燈捻彩線  
常侵曉露折新花綠珠生處非華屋碧玉由來自小家



怪底春風正無賴吹將柳絮落天涯

眉眼遙通授意微終朝軋軋自鳴機心靈暗地窺嘖笑  
膽怯幽踪怕是非背後不嗔頻執手人前相戒莫牽衣  
樂天老去閒情少一任春隨樊素歸

悲風落葉感颼颼牽挽裙衫只暫留燈下微挑心自許  
堂前再拜淚交流驚鳥欲止知誰屋彩燕翻飛別盡樓  
此後相逢定何處薜蘿春日滿山頭

長養毛衣似籠禽初來綠髮未勝簪稚年早露多情態  
薄命頻牽不定心墜蒂飛蓬人杳杳河魚天雁信沉沉  
只今霜月孤清夜誰與熏香理繡衾

次韻黃忍菴宮贊病中雜詠

偃仰滄江歲月多縱聽絲管不驚魔牛竒章荅白樂天索第云魔物或驚  
禪高鴻天外誰如爾鬪蟻牀頭且任他豈有蟣臣侵腠  
理便煩鳥爪起微瘡時患癬疥朝衫典去無須問已換新衣  
製芰荷

自慚顛顛卧鄉間鏡柄隨身學種蔬荒徑偶來求仲客  
帝城久絕子公書參差樹影微風動斷續雲容細雨疎  
炳燭光陰堪愛惜強從六藝恣畋漁

風流管領五湖春老去驚看才力新柿葉書多忘筆倦

王筠自序云松花酒熟看杯巡六如偈送蘇家妾時方喪妾

不覺筆倦  
八節灘娛白傅身聞道金門愁索米始知多福屬閒人  
世態紛紜總伎場任他跳擲舞黃塵歸田元亮貧仍樂



丈室維摩病不妨京洛塵沙無夢到名山煙洞有書藏  
迎來膝上王文度燈火團欒話一堂

車馬江干戶外停名園水竹敞軒櫺文懸都市知騰價  
碑立山根候製銘桐樹陰成宜鳳隱松身歲久作龍形  
陵苔自愧衰偏早未到秋風葉半零

再疊前韻

靜中調伏道心多早却杯鐺避酒魔樂天詩已伏酒魔休放醉座有

文儒差不雜好除書卷更無他大年獨享仍難老小劫

將過薄有瘥留取空明看月影一池渌淨不栽荷

行吟不用感三閭自笑長貧慣茹蔬蟬翳欲尋樹底葉

用顧愷之事螢乾重理案頭書雜京消息憎人問門巷蕭閒

喜客疎何處煙江容屏跡延緣便逐葦間漁

名園杳藹足留春竹石經營次第新雲愛竒峰當閣看

花憐笑靨繞檐巡庚申豈必煩三守道家言三守庚申三尸伏甲子

何須算六身兜率海山休擬待未甘屈曲作仙人見韓詩

講席金華久占場不將文采炫群麀陸佃埤雅麀喜文采故字從章見章

而惑者也獵戶多衣彩服誘之頻調鷓息神無恙細寫蠅頭眼未妨枉

渚曲隨三徑轉小山溪似一壺藏紫泥鸞鵲天書在

夜看星虹映草堂曾賜御書

萬卷丹鉛筆不停花光月影滿前櫺雲牋自寫來禽帖

仙蹟閒尋瘞鶴銘團扇客題文暢句王融愛柳惲亭臯隴首之句書之白

團扇惲字文暢屏風人畫樂天形樂天自詠云仍聞好應同若



木延華景莫羨看他逐葉零

東江詩鈔卷第五



